

CVII

1328-III-26, Real sobre Escalona. Provisión real de Alfonso XI al alcaide del castillo de Calentín, ordenándole que entregase dicho castillo a Pedro López de Ayala. (A.M. M. C.R. 1314-1344, f. 34r).

Don Alfonso, por la gracia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. A uos, (en blanco), alcayde del mio castiello de Ogijar, salut et gracia.

Bien sabedes en commo ese castiello que uos teniedes es mio et tengo por bien que me lo dedes.

Porque vos mando, vista esta mi carta, que entreguedes el dicho castiello de Calenti, que uos tenedes, a Pedro Lopez de Ayala, mio vasallo et mio adelantado mayor en el regno de Murçia, o a vn escudero fijodalgo que el enbiare alla en su logar.

Et non fagades ende al por ninguna manera, si non mando al dicho Pedro Lopez o al escudero, omne fijodalgo, que el a uos enbiare, que uos enplaze que parecades ante mi, do quier que yo sea, del dia que uos enplazare a treynta dias, so pena de mill maravedis de la moneda nueua, a dezir por qual razon me non queredes entregar el dicho castiello; si non, sabed, que si al dicho plazo non venieredes o non enbiaredes a mi vn escudero fijodalgo que me lo entregue, que yo que pasare contra uos commo contra aquel que non quiere entregar el castiello a su rey et a su sennor natural. Et de commo lo conplieredes mando a qualquier escriuano publico de qualquier villa o logar, que para esto fuere llamado, que de ende al que uos esta carta mostrare testimonio signado con su signo porque yo sea ende çierto; et non faga ende al, so pena del ofiçio de la escriuania. La carta leyda, datgela.

Dada en el Real de sobre Escalona, XXVI dias de março, era de mill et trezientos et sesenta et seys annos. Yo, Johan Sanchez, de la camara, la fiz escreuir por mandado del rey. Diego Garçia. Ruy Martinez. Diego Perez, vista. Alfonso Yannez. Pedro Bono. Johan Rodriguez.

